

HIGH COURT

Gauhati High Court chuan Kawnpui leh Sairang inkar national highway 306 siamtu NHIDCL hnuiaia contractor J. Infratech chu an hna-thawh chin leh kawng an siam zawh theih hun tur October ni 31 ral hma a affidavit hmanga thehlut turin a hriattir.

Kawnpui leh Khamrang inkar NH kawngpui chhia chungchangah hian Mizoram Truck Driver Association (MTDA) chuan Gauhati High Court Aizawl Bench-ah public interest litigation (PIL) an thehlut a, (PIL) hi judge pahnih thutna High Court bench in Zirtawpni khan a ngaihtuah a ni . MTDA khinna chung-chang-ah hian Gauhati High Court chuan NH enkawltu NHIDCL-in kawng siam tura hna a pek J. Infratech chu thubuaiah hian a hnûk lut (implead) a; hna an thawh tawh chin leh kawng an siam zawh theih hun tur October ni 31 hma ngeiin Court-ah affidavit hmanga thehlut turin a hriattir a ni.

J. Infratech hian sawifiahna affidavit an thehluh loh chuan Court-ah NHIDCL hotute an inlan a tul dan thu a tarlang a; thubuai ngaihtuah leh hun atan kar leh Zirtawpni, November ni 6 a ruat bawk a ni.



LAWNGTLAI LAND

Tunhnai a Lai Autonomous District Council (LADC) sorkar in Kaladan Multi Modal Transit Transport Project hnuiaia zangnadawmna beisei, mi 138 te ram pass a cancel chungchangah, Lawngtlai District Land Owners Association chuan, ram pass dik tak nei mi 138 nen ngaih pawlh loh an duh thu an sawi.

Lawngtlai District Land Owners Association President Pu T. Zatluanga chuan, helai kawngpui sialin a tihchhiat ni a insawi mi 303 te chu kum 2016 khan zangnadawmna pek tura ruahman a ni a ti a. Ram pass chungchangah felhlel a awm ni a hriat vingin Anti Corruption Beureau (ACB) chuan mi 303 te Ram pass chu a chhui chianga, mi 138 te ram pass chu a dik tih finfiahin, mi 102 te Ram pass chu ngaihtuahzui turin a ti tih sawiin, He thu kal zelah hian a hma a Ram pass dang chhui chian lai nen, kumin September ni 26 khan Special Judge (Prevention of Corruption) chuan mi 138 te ram pass cancel tura a tih bawhzuiin, LADC sorkar chuan mi 138 te ram chu a Cancel ta a ni a ti.

ACB in ram pass dik mi 138 a finfiah leh Pass diklo a ngaih 138 cancel hi a zat a inan vingin KMMTTP a ram neitu, zangnadawmna hmuh ngiattute ram chu cancel vek anga ngaih palh theih a nih thu Pu T. Zatluanga chuan a sawi a. Pass diktak neite mi 138 te chuan Sorkar thuneituten theihtawp an chhuahpuina vingin zangnadawmna pawh hmuh thuai an beisei tih a sawi a ni.



GUN POWDER

Assam Rifles miten nimin khan Zokhawthar a Khawmawi nena intlawh pawhna lei-ah silai zen kg 27 leh gram 60 an man.

Wawiina Assam Rifles thuchhuahin a tarlan danin Mizoram leh Myanmar inkalpawhna thir lei-ah dan khap thil ken tlang tum an awm ni a thu an dawn bawhzui-in nimin khan mi kal vel an thlithlai a. He tih lai hian mi pakhat chu a thil ken an rinhlelh avangin ding turin an ti a, ani chu ral leh lama a tlanchhiat hman avangin an man ta lova. A ip ken a tlanchhiatsan an en chian na ah, silai zen kg 27 leh gram 60 an hmuhchhuak a , an silai zen man hi Zokhawthar Police Station-ah chhui zui turin an hlan nghal a ni.



MNF BANDH

Tun thla ni 29-a MNF in Total Bandh an huaihawt turah bandh in a huam ve lo tur point pakua an tichhuak.

FCAA, 2023 duhlohna lantirnana pawn chhuah khap huaihawt turin a huam loh tur te hi Media lama thawktute, Health, PHE leh Electric lamah Emergency a duty te leh Law & Order kengkawhtute, Bawngnhnute semte, an lo dil lawk tawh avangin Synod Committee pawimawha kal turte, Chief Electoral Officer (CEO) pisa-a thawkte leh Election kaihhnawih buaiputute, bye-election hmabak Mamit District pumpui,

Hnam Run atanga phalna pekte, Thlawhna ticket nei leh Inneih, chhiatni thatni thila phalna la te, District, Sub Hqrs leh Block ten phalna an pek apiangte an nih thu MNF General Headquarters hnuaia Action Committee FCAA 2023 chuan an tarlang a ni.



MANN KI BAAT

Prime Minister Narendra Modi-a’n vawiin khan Akashvani-ah Mann Ki Baat hun hmangin Chhath Kut hmangtu zawng zawng, a bikin Bihar, Jharkhand leh Purvanchal mipuite hnenah duhsakna chibai a hlan. India mi tawh phawt chuan Operation Sindoor hlawhtlinna an chhuang tak meuh tih sawiin Maoist-ho hluarna hmunah te pawh lawmna khawnvar chhit a ni, a ti a, Maoist-te chu an fate hmalam hun tichhe thei anih avangin mitinin thenfai an duh a ni, a ti.

GST Bachat Utsav-in mi nawlpuia malsawmna a thlen chu lawmawm a tih thu sawiin Pu Modi-a chuan Sakhaw hun pawimawh lawm laia ramchhung thil siam chhuahte leitu, nasa taka an pung chho chu a lawmawm tak zet a ni, a ti bawk.

